

ԿԱՐԾԻՔ
ՊԱՇՏՈՆԱԿԱՆ ԸՆԴԴԻՄԱԽՈՍԻ
ՌՈՒԲԵՆ ԳԱԳԻԿԻ ՈՍԿԱՆՅԱՆԻ

«Աշտարակ քաղաքի պատմամշակութային հուշարձանների տարածքի կազմակերպման դիզայներական խնդիրները» թեմայով ատենախոսության վերաբերյալ, ներկայացված ԺԷ.00.03- «Կերպարվեստ, դեկորատիվ և կիրառական արվեստ, դիզայն» մասնագիտությամբ արվեստագիտության թեկնածուի գիտական աստիճանի հայցման համար

Ատենախոսությունը յուրահատուկ ուսումնասիրություն է և օգտակար գործնական տեսակետից: Աշտարակը Հայաստանի փոքր պատմական քաղաքներից է, որ կարևոր է հատկապես իր հարուստ պատմամշակութային ժառանգությամբ: Առաջնահերթություն է ոչ միայն քաղաքի պատմական հուշարձանների պահպանությունը, այլ նաև դրանց տարածքների դիզայներական համակարգումը և՛ որպես միջավայրի կազմակերպում, և՛ որպես զբասաշրջային օբյեկտ:

Փաստորեն, Աշտարակի հնագիտական և ճարտարապետական հայկական հարստությունը՝ ուսումնասիրության առարկա է դարձել 1960-1980թթ.: Ներկա վիճակում բնագավառի ճանաչողությունը մեծ փոփոխությունների է ենթարկվել, հատկապես փոփոխվել են բնակավայրի քաղաքաշինական իրավիճակը, ուստի կարևոր է ընդհանուր քաղաքային կերպարի, հուշարձանատարածքների միջավայրային վերակազմակերպման ու ծավալատարածական ներդաշնակեցման անհրաժեշտությունը:

Աշտարակը, ինչպես նշում է հեղինակը, բազմաշերտ քաղաք է պատմաճարտարապետական առումով, և որքան մեզ հայտնի է, այն խորապես չէր դիտարկվել իր կառուցվածքի պատմա-գեղարվեստական շերտերով, ինչն իր առջև խնդիր է դրել հեղինակը: Այդ խնդիրները նա բաժանում է հինգ կետերի: Հատկապես կարևորվում է երկրորդ կետը, որտեղ անհասկանալի է «գրասենյակային համակառուց» արտահայտությունը, այսինքն «ստեղծագործական վաճառ», ինչպես Կոմայգին է եղել, որտեղ Պարույր Սևակը գրել է իր պոեմը, նվիրված Կոմիտասին, ինչի ականատեսն անձամբ եմ եղել: Մնացածը հասկանալի է և անհրաժեշտ:

Ուշագրավ է, որ հեղինակն այդ խնդիրների լուծումը, այսինքն քաղաքը որպես հանգստի վայր, ինչի նշանակությունը մեծ է, անհրաժեշտ է համարում:

Կարևոր է, որ ինչպես նշում է հեղինակը, քաղաքի պատկերը և նրա արտաքին տեսքի բարելավումը դիտարկվում է ոչ այնքան ճարտարապետության, որքան դիզայնի տեսակետից, որ նորարարություն կարելի է համարել և անհրաժեշտ:

Բուն աշխատանքը կազմված է ներածությանը հաջորդող երեք գլուխներից, եզրակացություններից, 38 անվանումով հայ և օտար գրականության ցանկից և մանրամասնող գծագրական տախտակներից:

Առաջին՝ «Պատմատեսական և զուգահեռների ընդհանուր տեղեկություններ» գլխում նախ նշվում է, որ քաղաքը շատ հին է՝ ելնելով հնագույն դամբարանադաշտերից: Հեղինակը փորձ է անում ըստ ժամանակաշրջանների դիտարկել հուշարձանները՝ նախնադարի, միջնադարի և նոր ու արդի հուշարձաններ: Այդ հուշարձանները նշվում են ըստ ժամանակաշրջանների. մինչև մեր օրերը: Հեղինակի մտածողությունը գիտական է, նույնիսկ այն դեպքերում, երբ խնդիր է ունենում

հուշարձանների ժամանակագրական տիպերի, համակարգերի սիստեմավորման հարցում:

Ատենախոսի կողմից քննականորեն ներկայացվել է ատենախոսության պատմատեսական հենքը, ինչպես նաև դիտարկվել են Աշտարակին զուգահեռ՝ հայկական և միջազգային համապատասխան օրինակներն ու դրանց ներդրման ՅՈՒՆԵՍԿՕ-ի ԵՎ ԻԿՈՄՈՍ-ի դրույթները: Ատենախոսության քաղաքային կերպարի և միջավայրային դիզայնի դրույթները հիմնվում են Քնին Լինչի հայտնի «Քաղաքի կերպար» (1980թ.), ինչպես նաև Վլադիմիր Շիմքոյի «Միջավայրի դիզայնի կազմակերպման սկզբունքները» (2005թ.) դասագրքերի մասնագիտական դրույթների վրա:

Նա ներկայացնում է համակարգ հնագույն, հին և նոր կառույցների իր դասավորման մասին ըստ ժամանակաշրջանների, որպեսզի մշակույթի և արվեստի նյութերը ներկայացվեն կարգավորված վիճակում, ինչն էլ հայեցակարգային ենթատեքստով փաստագրվել և վերլուծվել են հաջորդ երկու գլուխներում: Նա առաջադրում է բաց երկնքի տակ թանգարանային համալիր՝ նշելով մի շարք կետերով այդ գաղափարի իրականացումը: Սրանք առաջին գաղափարներն են:

Երկրորդ գլուխը՝ «Աշտարակ քաղաքի շրջակա պատմամշակութային հուշարձանների տարածքի դիզայնի և կազմակերպումը», նվիրված է Աշտարակի շրջակա հուշարձանների դիզայնի և կազմակերպմանը, այդ թվում են՝ Վերին նավերի տարածքը, Վաղագույն դամբարանաբլուրը, Թռեղք վանածորյան մշակույթի դամբարանները, Կարմիրբերդյան մշակույթի դամբարանները, Սևան-Արցախյան դամբարանաբլուրը և այլ դամբարանների ու կոթողներ: Այնուհետև փաստագրավերլուծվել ու դիզայնի և կազմակերպման սահմանված հայացեկարգով կազմակերպվել են՝ Խոջաբաղեր դամբարանադաշտը, ուրարտական ջրանցքը, Ուլետիտիկ բնակավայրը և այլն: Ինչպես ցույց է տալիս հեղինակը, 1972թ. կոնվենցիայից մշակութային կամ բնական ժառանգության որևէ օբյեկտի վնասումը կամ անհետացումը հանգեցնում է «բոլոր ազգերի ժառանգության կործանարար աղբատացմանը»:

Երրորդ՝ «Աշտարակ քաղաքի կորիզի հուշարձանների տարածքի դիզայնի և կազմակերպումը» գլուխը նվիրված է Աշտարակի շրջակա հուշարձաններին՝ Ս.Մարիանե, Ուռուց, Մշակույթի տուն, Բնակելի տների գոտին (զանազան ժողովրդական բնակելի տներ), Բերդաթաղի հուշարձանները (Աշտարակի բերդը, Ս. Ծիրանավոր, Ս. Սպիտակավոր, Կարմրավոր) և այլ կառույցները (հին կամուրջը, Պերճ Պոռոջյանի տուն թանգարանը և այլն): Դրանք պատմա-գեղարվեստական մեծ արժեք ունեն: Աշտարակի և նրա հուշարձանների գոյությունը ոչ միայն դրանց արժեքն է, այլև որ դրանք քարե դարի ժամանակներից հասնում են մինչև մեր օրերը: Եվ մեր հեղինակի մեծ ծառայությունը դրանց համակարգումն է ըստ ժամանակի՝ միջին բրոնզե դարից մինչև միջնադարյան կոթողներ: Հեղինակը բարձր է գնահատում հնագետներին և Աշտարակի ու շրջակայքի գեղարվեստական գործերի գնահատումը թողնում է նրանց:

Ատենախոսության վերջին գլխում անդրադարձ է կատարվում հուշարձանների դիզայնի և կազմակերպմանը, որի ուսումնասիրության մասին կարելի է երկար խոսել, քանի որ այն՝ գիտակ և մասնագետ մարդու վստահելի աշխատանք է, ինչպես նկարագրություններում, այնպես էլ վերլուծություններում:

Աշխատության վերջում եզրակացություններ են, որտեղ ամփոփված են հետազոտության հիմնական արդյունքները:

Ամփոփելով աշխատանքը նշենք, որ ատենախոսությունն ունի դիզայներական կազմակերպման գեղագիտական և ձևավորման տեսակետներ, ինչպես նաև ընդհանուր եզրակացություններ, որոնք ամրագրում են Աշտարակի պատմամշակութային ժառանգության հուշարձանների դիզայներական կազմակերպումը արտաքաղաքային և ներքաղաքային երկու գոտիներով:

Արտաքաղաքայինի հայեցակարգում ներմուծվել են՝ Աշտարակը շրջանցող մայրուղին, մասնավորվում են մայրուղուց ճյուղավորվող դեստինացիաները, դիզայներական միջոցառումներ են՝ ազդանշանային միջոցների տեղաբաշխումը, այցելության միջավայրի ֆունկցիոնալ և հորինվածքային մթնոլորտի ու տարրերի ստեղծումը և ներդաշնակության միջոցներով ապահովումը:

Ներքաղաքային հուշարձանների տարածքի կազմակերպումը սկսվում է քաղաքաշինական իրադրությունից, ապա անցում է կատարվում ներքաղաքային միջավայրի կազմակերպման հարցերին, որոնք նույնպես առաջնորդվում են դիզայնի առարկայական միջավայրի ներդաշնակեցման խնդիրներով:

Ավարտելով մեր խոսքը, եզրակացնում ենք, որ այն գիտակ և ցավող մարդու խոհեր են՝ միանգամայն ռեալ:

Ռուբեն Ոսկանյանի ատենախոսությունը կարելի է համարել կայացած գիտական աշխատություն: Բարձր գնահատելով հանդերձ ներկայացվածն ունի հետևյալ դիտողությունները.

1. «Աշտարակ քաղաքի պատմամշակութային հուշարձանների համալիր կազմակերպման ինֆրակառուցվածքի հավելումը՝ որպես գրասենյակային համակառույց, հանգստի կազմակերպման օբյեկտներ, մատչելիության միջոցառումներ» կետում անհասկանալի է «գրասենյակային համակառույց» արտահայտությունը, ինչը բացատրության կարիք ունի:
2. Ատենախոսության գրականության ցանկում ընդգրկված աշխատություններում պետք է նշվեր նաև ընդհանուր էջերի քանակը:
3. Ատենախոսությունը հարուստ վերլուծությամբ հանդերձ, կարծում եմ, որ ցանկալի է գծագրական իյուստրացիաները նույնպես ներկայացվեին հարուստ կազմով:

Վերոնշյալ դիտողությունները բնավ չեն նվազեցնում ատենախոսության գիտական արժեքը, և ատենախոսի կողմից ներկայացված աշխատությունն իր իսկ հայցած գիտական աստիճանի և գիտական արժեքից բացի ունի նաև պրակտիկ ու կարևոր նշանակություն:

Արդյունքում՝ գտնում եմ, որ Ռուբեն Գագիկի Ոսկանյանի «Աշտարակ քաղաքի պատմամշակութային հուշարձանների տարածքի կազմակերպման դիզայներական խնդիրներ» թեմայով ատենախոսությունն իր գիտական պատշաճ մակարդակով լիովին համապատասխանում է Հայաստանի Հանրապետությունում գիտական աստիճանաշնորհման կանոնակարգի 7-րդ կետի՝ «գիտության նվազագույն կարևոր նշանակություն ունեցող խնդրի լուծում» պայմանին, իսկ ատենախոսը միանգամայն արժանի է ԺԷ.00.03- «Կերպարվեստ, դեկորատիվ և կիրառական արվեստ, դիզայն» մասնագիտության գծով արվեստագիտության թեկնածուի գիտական աստիճանի շնորհմանը, և գիտական արժեքից բացի ունի նաև պրակտիկ և կարևոր

նշանակություն, ինչի համար էլ միջնորդում եմ ՀՀ ԳԱԱ Արվեստի ինստիտուտի 016 մասնագիտական խորհրդի հարգարժան անդամներին:

**Պաշտոնական ընդդիմախոս՝
ՀՀ ԳԱԱ Արվեստի ինստիտուտի կերպարվեստի բաժնի վարիչ,
ՀՀ ԳԱԱ թղթակից անդամ,
արվեստագիտության դոկտոր, պրոֆեսոր՝**



Վիգեն Նալարյան

ՀՀ ԳԱԱ Արվեստի ինստիտուտի կերպարվեստի բաժնի վարիչ, ՀՀ ԳԱԱ թղթակից անդամ, արվեստագիտության դոկտոր, պրոֆեսոր Վիգեն Նալարյանի ստորագրությունը վավերացնում եմ՝

**Արվեստագիտության 016 մասնագիտական խորհրդի գիտքարտուղար՝
ՀՀ ԳԱԱ Արվեստի ինստիտուտի տնօրենի տեղակալ,
արվեստագիտության դոկտոր, պրոֆեսոր՝**



Աննա ԱՍԱՏՅԱՆ

17 սեպտեմբերի 2020թ.

